

AUGLÝSING

um starfsleyfi fyrir Hringrás hf. til móttöku, vinnslu og geymslu
brotamálma að Klettagörðum 9, Reykjavík.

1. Almenn ákvæði.

- 1.1. Starfsleyfi þetta gildir fyrir móttöku, vinnslu og geymslu brotamálma hjá fyrirtækinu Hringrás hf. að Klettagörðum 9, Reykjavík.
- 1.2. Mengunarvarnir Hollustuverndar ríkisins geta, að höfðu samráði við Heilbrigðiseftirlit Reykjavíkur, lagt til við umhverfisráðherra, að starfsleyfið verði endurskoðað, ef í ljós kemur hætta á skaðlegum áhrifum á heilsufar almennings eða hætta á röskun lífríkis, frá starfseminni.
- 1.3. Um varnir gegn skaðlegum áhrifum á starfsmenn og starfsumhverfi fer samkvæmt lögum nr. 46/1980 um aðbúnað, hollustuhætti og öryggi á vinnustöðum.
- 1.4. Fyrirtækinu er skylt að sjá um, að fyllstu snyrtimennsku og góðrar reglu og umgengni sé gætt á athafnasvæði fyrirtækisins. Úrgang og annað rusl, svo sem plast og pappír, sem kann að berast út fyrir athafnasvæðið skal hreinsa upp jafnóðum.
- 1.5. Sérstök öryggisgirðing skal vera umhverfis athafnasvæðið. Skal hún vera mannheld og þannig gerð að sem minnst sjáist inn á svæðið. Hlið á girðingu skulu vera læst utan afgreiðslutíma.
- 1.6. Óski fyrirtækið eftir því að gera umtalsverðar breytingar á rekstrinum, skal sækja um nýtt starfsleyfi til Hollustuverndar ríkisins, í samræmi við ákvæði mengunarvarnareglugerðar nr. 389/1990.
- 1.7. Komi fram mengun frá starfsemi fyrirtækisins, sem ekki er í samræmi við gögn sem lögð eru fram með umsókn um starfsleyfi, ber fyrirtækinu að stöðva frekari mengun, á sinn kostnað, og hreinsa þá mengun sem þegar hefur orðið, og ber fyrirtækið allan kostnað sem af þessu leiðir.
- 1.8. Ákvæði laga nr. 81/1988, um hollustuhætti og heilbrigðiseftirlit svo og mengunarvarnareglugerðar nr. 389/1990 gilda um starfsemi fyrirtækisins eftir því sem nánar er fyrir mælt í starfsleyfi þessu.

2. Varnir gegn mengun ytra umhverfis.

- 2.1. Áður en vinnsla fer fram skal fjarlægja alla vökva úr bifreiðum, vélum, þrístikerfum og tækjum, s.s. smurolíur, þrýstiolíur, kælivökva og eldsneyti. Vökva þessa skal endurnýta eftir því sem kostur er á, en að öðrum kosti farga reglum samkvæmt. Framangreint á einnig við um rafgeyma.
- 2.2. Fjarlægja skal freon og halon af öllum búnaði, þar sem þar er notað sem kæli- eða slökkviefni. Skal það gert með tækjum sem tryggja að efnin berist ekki út í umhverfið. Tegundum skal haldið aðskildum og þær geymdar í ílátum sem Hollustuvend ríkisins hefur viðurkennt til slíkra nota. Allt freon og halon skal sent til endurvinnslu.
- 2.3. Notaða rafgeyma skal fyrir vinnslu geyma í sýruhældum ílátum. Geymasýru skal safna saman, síða og stilla af sýrustig 5-9 áður en henni er fargað. Blýagnir úr geymasýru þurfa að botnfalla og þeim síðan komið til endurvinnslu eða fargað sem hættulegum úrgangi.
- 2.4. Með efnagreiningu skal ganga úr skugga um að allir rafspennar, rofar og þéttar, sem fyrirtækið tekur á móti innihaldi ekki PCB. Þetta skal framkvæmt áður en olía af búnaði er fjarlægð. Ef olía sem hefur verið fjarlægð, af slíkum búnaði, inniheldur meira en 50 ppm af PCB skal henni fargað sem umhverfismengandi úrgangi. Ef olía úr búnaði inniheldur meira en 2000 ppm af PCB er vinnsla búnaðarins óheimil og ber að farga honum samkvæmt fyrirmælum Mengunarvarna Hollustuverndar ríkisins. Sýnataka og efnagreining skal framkvæmd af aðila sem er viðurkenndur af mengunarvörnum Hollustuverndar ríkisins.

- 2.5. Olíu sem inniheldur efnasambönd klórs, þ.m.t. PCB skal farga sem umhverfismengandi úrgangi.
- 2.6. Á svæðum þar sem vökvar eru tæmdir af bifreiðum, bifreiðahlutum og vélum og öðrum slíkum búnaði, einnig þar sem unnið er með rafspenna, rofa eða þetta skal vera steypu undirlag. Á fráveitu frá þessum undirlögum skulu vera olíuskiljur.
- 2.7. Stærð og gerð olíuskilju skal miða við að olía í fráveituvatni sé ekki meiri en 15 mg/l. Aðstaða skal vera til sýnatöku af fráveituvatni þar sem það kemur úr olíuskiljum.
- 2.8. Fylgst skal reglulega með olíuskiljum og þær tæmdar eftir þörfum. Olíuna skal endurvinnna eftir því sem kostur er en farga að öðrum kosti reglum samkvæmt.
- 2.9. Opin brennsla er óheimil á athafnasvæðinu. Einungis er heimil brennsla í brennsluofni með reykhreinsibúnaði sem Hollustuvernd ríkisins hefur viðurkennt. Óski fyrirtækið að koma upp brennsluofni þarf að fá sérstakt starfsleyfi fyrir slíkan rekstur.
- 2.10. Takmarka skal umhverfishávaða frá starfseminni eftir því sem kostur er. Hávaði við lóðamörk má ekki vera meiri en 70 dB (A) Leq. Ef um er að ræða ríkjandi tón eða reglulega hávaðatoppa skal lækka mörkin um 5 dB (A) Leq.
- 2.11. Við athafnasvæði fyrirtækisins skulu vera skilti með greinilegri áletrun um afgreiðslutíma þess og hvar móttaka mismunandi hráefna fer fram.
- 2.12. Aukaafurðir sem koma frá starfseminni, plastefni, gúmmí, trefjaefni, gler o.fl. skulu flokkaðar og haldið aðgreindum t.d. í gámum. Koma skal þessum efnum til endurvinnslu eftir því sem kostur er á. Flokkun þessi og geymsla skal fara fram á steypu undirlagi, fráveita skal vera útbúin olíuskiljum. Önnur förgun skal fara fram reglum samkvæmt.
- 2.13. Skrá skal í sérstaka dagbók allar aukaafurðir og úrgang sem til fellur og fluttur er af svæðinu. Þar skal koma fram dagsetning flutnings, nettóþyngd þess flutta, fyrirhuguð afdrif þess og nöfn flutningsaðila og móttakanda. Í byrjun hvers árs skal taka saman yfirlit yfir þessar upplýsingar fyrir næst liðið ár og senda Hollustuvernd ríkisins fyrir 1. mars ár hvert. Sérstaka dagbók skal halda vegna notkunar á olíuskiljum. Þar skal skrá jafnóðum hvenær eigið eftirlit og tæming fer fram. Dagbækur þessar skulu liggja frammi við eftirlit með fyrirtækinu.
- 2.14. Á hverri vinnuvakt skal starfa vaktstjóri sem hefur góða þekkingu á öllum búnaði og starfsreglum fyrirtækisins, þar með talið skráningu og flokkun brotamálma, aukaafurða og úrgangs. Vaktstjóri skal einnig hafa þekkingu á ákvæðum starfsleyfis þessa og þeim lögum og reglum sem um starfsemina gilda. Eintök af starfsleyfi og viðkomandi lögum og reglum skulu ávallt tiltæk á vinnustað. Einnig skal fyrirtækið tilnefna fulltrúa sem eftirlitsaðilar geta haft samband við utan afgreiðslutíma fyrirtækisins, ef þörf krefur.

3. Eftirlit og gjaldskylda.

- 3.1. Starfsemi Hringrásar hf. fellur í annan gjaldskrárflokk samkvæmt viðauka 8 í mengunarvarnareglugerð nr. 389/1990. Gjald þetta skal standa undir kostnaði við sérhæft eftirlit Hollustuverndar ríkisins, samanber þriðja kafla reglugerðarinnar.

4. Gildistaka.

- 4.1. Starfsleyfi þetta gildir til 1. janúar 2001 og er veitt í samræmi við áttunda kafla reglugerðar nr. 389/1990, um starfsleyfi fyrir atvinnurekstur sem getur haft í för með sér mengun, sem sett er með stöð í 3. gr. laga nr. 81/1988, um hollustuhætti og heilbrigðiseftirlit og öðlast þegar gildi.

5. Ákvæði til bráðabirgða.

- 5.1. Rannsókn skal fara fram á þeirri jarðvegsmengun sem orðið hefur á athafnasvæði fyrirtækisins af völdum PCB- og dioxín efna. Rannsaka skal jarðveg á umræddu svæði og vistkerfi sjávarins í nánd. Á grundvelli niðurstaðna verður tekin ákvörðun um hvaða aðgerðir séu nauðsynlegar til að koma í veg fyrir að þessi efni berist áfram út í umhverfið. Engar framkvæmdir eða starfsemi mega eiga sér stað á athafnasvæði fyrirtækisins sem torvelað gætu umrædda rannsókn eða aðgerðir vegna jarðvegsmengunar. Sýnatöku og rannsóknnum skal lokið eigi síðar en 21. júní 1991.

Umhverfissráðuneytið, 10. apríl 1991.

F. h. r.
Páll Línal.

Sigurbjörg Sæmundsdóttir

Nr. 168

REIKNINGUR

Tryggingasjóðs viðskiptabanka fyrir árið 1990.

Rekstrarreikningur 1. janúar – 31. desember 1990.

Tekjur:

Árgjöld viðskiptabanka	135 611 552
Verðbætur og vextir af verðbréfum	103 053 896
Vaxtatekjur af bankainnstæðum	232 959
Tekjur alls	238 898 407

Gjöld:

Stjórnarlaun	1 239 694
Annar rekstrarkostnaður	175 000
Verðbreytingagjöld	38 318 531
Gjöld alls	39 733 225
Hreinar tekjur	199 165 182

Efnahagsreikningur 31. desember 1990.

Eignir:

Innistæða í Seðlabanka Íslands	14 271 803
Áfallnir vextir	972 908
Verðbréf	758 507 527
	773 752 238

Eigið fé:

Frá fyrra ári	536 268 525
Hreinar tekjur skv. rekstrarreikningi	199 165 182
Verðbreytingagjöld	38 318 531
	773 752 238